

Glion, ils 22 d'avrel 2023

Communicaziun allas medias:**Success per l'emprema sessiun da giuventetgna Ilanz/Glion dils 22 d'avrel 2023**

Sonda, ils 22 d'avrel 2023 han 28 giuvenils dalla vischnaunca Ilanz/Glion surdau al president communal tschun incumbensas tier las tematicas mobilitad, liug da s'entupada/veta nocturna e temps liber/infrastructura. Duront l'emprema sessiun da giuventetgna Ilanz/Glion ei vegniu discutau, empruau e votau.

Meglieras colligiaziuns dil traffic public ellas fracziuns

Sco *Martin Capeder*, commember dalla suprastonza communal e denter auter era responsabel per la mobilitad ella vischnaunca Ilanz/Glion, ha declarau gia tiel discuors all'entschatta dalla sessiun, ein las fracziuns lontanass dalla vischnaunca accessiblas mo malamein cul traffic public. Quella constataziun ha impressiunau ils giuvenils. Il plenum ha sinaquei dau suatientscha cun gronda maioritad all'incumbensa, che tut las fracziuns duessen esser survidas silmeins treis gadas a di cul traffic public.

Era l'incumbensa d'in "bus dil local da giuventetgna" ei vegnida approvada dalla pluralitad dallas participontas e dils participonts. Quei bus duei carrar ils giuvenils a casa ellas fracziuns mintgamai il venderdis- e la sonda-sera suenter lur sortida el local da giuventetgna a Glion.

In pli grond local ni in local da giuventetgna en in auter liug?

Il local da giuventetgna dalla vischnaunca Ilanz/Glion sesanfla il mument ordeifer il marcau agl ur d'igl uaul. Igl ei prevesibel ch'igl ei d'anflar ils proxims onns in niev liug, cun quei ch'il niev luvratori communal ei planisau sigl areal actual. Suenter discussiun intensiva el plenum ei vegniu proponiu e decidiu ch'ei drovi buca exnum in pli grond, mobein aschi spert sco pusseivel in auter local per scolars e scolars dalla vischnaunca.

In pumptrack tonscha buc

Duront ils "WarmUps" ha *Marco Bracher*, president dall'uniun a Glion, declarau la situaziun actuala davart in pumptrack ch'ei gia dapi tschun onns en discussiun culla vischnaunca. Tenor il president communal *Marcus Beer* duei quei vial vegnir realisau proximamein. Ils giuvenils selegnan sin quella nova purschida, els vulessen denton bugen engrondir quella cun in parc da skater. Da differentas gruppas ei vegniu inoltrau duas incumbensas en caussa. La varianta cun in parc da skater suttetg ei denton vegnida retratga.

In local da notg senza fem

Dapi ils onns '90 regia a Glion ina muria dils locals da notg. *Roberto Giovanoli*, gastronom innovativ da Silvaplana, ha declarau el discuors dalla damaun las sfidas da menar in local da notg. Tonaton han ils giuvenils incumbensau la suprastanza communal unanimamein da metter a disposiziun stanzas adattadas per in local da notg en in liug central. La cundiziun la pli impurtanta era denton ch'ei astgi buca vegnir fimau en quei local. Sco il president communal ha declarau, seigi d'anflar igl'emprems ina sligiazion culs menaders dils locals da notgs existents.

Negina maiortad per in'uniun tetgala dallas uniuns da giuventetgna

In'ulteriura gruppa da lavur ha proponiu che la vischnaunca duei crear in'uniun da giuventetgna sur tut las fracziuns. Quella uniun tetgala duessi promover il brat ed il contact denter ils giuvenils da tut las fracziuns ed organisar projects sur tut las generaziuns. Quella proposta ei denton vegnida renviada cun 12 tier 16 vuschs.

Empruar enstagl da studegiar

Prasad Raja, sviluppader da rikschas motorisadas ha buca mo presentau als giuvenils sia idea, mobein era schau seser els al guvernagl da ses Tuktuks. Quella caschun han ils giuvenils nazegiau bugen ed enqualin ha numnau silsunter quei gir sco punct culminont dalla sessiun da giuventetgna.

Ughegiar da dir siu meini, tedlar tier als auters e far cumpromiss, quei seigi la basa dalla politica, ha la cussegliera guvernativa ed anteriura presidenta communal da Ilanz/Glion, *Dr. Carmelia Maissen* declarau tier siu plaid d'avertura. Maissen ha accentuau che la basa democratica dalla Svizra fetschi insumma pér pusseviva quella cumi-nonza politica.

La sessiun da giuventetgna ei vegnida menada el co-presidi da *Sarina Casanova*, la presidenta dalla cumissiun da giuventetgna e da *Gierina Gabriel*, la presidenta dil parlament communal. Ils giuvenils ein vegni sustegni duront las lavurs en gruppa da commembras e commembers dil parlament communal. Era ils commembers dalla suprastanza communal ha demussau grond interess alla sessiun da giuventetgna, aschia ch'ils giuvenils san esser segirs che lur giavischs ein vegni udi dallas autoritads communalas.

Tenor reglement dalla cumissiun da giuventetgna Ilanz/Glion duei quei dar uss regu-larmein, mintga dus onns, ina sessiun da giuventetgna en vischnaunca.